

以廣招藝徒嫻習手藝將來藝成給予文憑分遣各屬其村莊中有願開井者就地取材利大而工料不費大河以北農田凡濬渠引河窮於設施者或於鑿井另闢一法維彼鄉民有不樂於從事乎已故大學士李鴻章前督畿輔曾飭各州縣勸民開井彼時應者寥寥雖州縣奉行不力亦由民間風氣未開今工藝官局開井科先於京城地面爲之倡數年後藝成推廣各處汲飲有益於衛生灌溉尤便於耕作似於國計民生不無裨益如蒙 俞允俟命下之日應由臣部咨行各衙門一體遵照一面飭由該局於京城中相擇官地次第舉辦逐漸推廣以仰副 朝廷勸工重農之至意謹 奏奉 旨依議欽此

商部奏在籍員紳創設筆鉛公司擬請准予立案保護摺

竊臣部於光緒三十年十月初十日接據江蘇在籍臣部頭等顧問官翰林院修撰張謇在籍安徽候補道許鼎霖呈稱中外通商以來中國資財流出外洋不可數計卽筆鉛罐一項各省銀元銅元局鍊鐵鍊鋼廠在所必需購自外洋歲溢鉅萬查江蘇鎮江府丹徒縣螺螄山地方所產筆鉛足供造罐之用當經前往勘明集股十萬兩創設開成公司此項筆鉛罐半係官局官廠購用請於新訂商約出廠稅未經施行以前暫免稅釐俟廠稅定後照章完納一次聽於中國境內行銷不再重征外洋需用此罐尤百倍於中國苟准免完出口之稅

則售價益廉外洋必爭向購取惟興利之舉創辦維艱攙奪阻撓均未能免請通飭地方文武照章保護並准專辦二十年即將該縣境內出產筆鉛等處由公司照時價核購以便擴充不得售與他人及售與外人等情呈請 奏咨前來臣等竊查筆鉛罐一項昉於英國麻艮公司以之鎔化金銀銅鋼玻璃等類能耐配料侵蝕之力每罐可用八十次至一百次其製造之法中國素未講求局廠所需皆購自外洋日後推擴銀圓銅圓鍊鐵鍊鋼製造玻璃等事爲數尤鉅若不急思抵制誠不足以維商業而挽利權今該紳張謇等請創設開成公司意在振興實業開闢利源洵堪嘉尙擬准其立案在鎮江境內酌予專辦十年並由臣部咨商外務部准其於新訂商約出廠稅未經施行以前先行援照湖北織布廠北洋煙草公司成案完納值百抽五正稅一道概免重征俟新約開辦再行照章完納原呈所請暫免稅釐之處應毋庸議庶於課儲商業兩有裨益惟是開辦伊始民情多疑誠不免有攙奪阻撓情事應請 飭下兩江總督江蘇巡撫通飭所屬實力保護不得稍存膜視一面由臣部諭令該紳等按照臣部 奏定公司律切實辦理隨時咨報查核謹 奏

墾務大臣綏遠城將軍貽奏伊克昭盟杭錦旗報墾蒙地改收押荒摺

竊查伊克盟七旗於光緒二十九年春夏間陸續報墾惟杭錦一旗既允忽翻疊經奴才據